



Sesida dals

20 da december 2022

Communitgà ils

22 da december 2022

Protocol nr.

1010/2022

Incumbensa Grass

concernent il project da pilot «sajet da defensiun tar attatgas da luf sin animals da niz»

Resposta da la Regenza

La populaziun da lufs en Svizra crescha fermamain e vegn er vinavant a sa dublegiar mintga dus fin trais onns. Ils manaschis d'alp dals chantuns da muntogna èn spezialmain pertutgads da quest svilup. La cultivaziun da la cultira e da las surfatschas d'alpegiada na dastga dentant betg vegnir messa en dumonda pervia da la preschientscha dal luf. Il return dal luf sto perquai vegnir concepì en tala moda e maniera, ch'ils interess d'utilisaziun e da protecziun vegnan accordads in cun l'auter. Questa coesistenza solida tranter umans, animals da niz ed il luf pretenda d'ina vart mesiras raschunaivlas en il sector da la protecziun da las muntaneras, e da l'autra vart in management dal luf modern ed adattabel cun la pussaivladad da regular la populaziun da lufs en moda adequata.

Tar il punct 1: Sin basa da la situaziun explitgada en connex cun la preschientscha dal luf en il Grischun, pretenda l'incumbensa qua avant maun da coordinar cun auters chantuns da muntogna la dumonda, co proceder concernent il sajettar lufs analogamain a la Frantscha. Il concept dal «tir de défense» che vegn cità en l'incumbensa e che vegn pratitgà en Frantscha cuntrafaschess dentant a l'art. 12 al. 1 e 2 da la Lescha federala davart la chatscha e la protecziun dals mamifers e dals utschels selvadis (Lescha da chatscha, LChP; CS 922.0). Sin basa da l'art. 12 LChP prendan ils chantuns mesiras per evitar donns da selvaschina (al. 1) ed els pon da tut temp ordinar u permetter mesiras cunter singuls animals ch'èn protegids u permiss per la chatscha, ils quals han chaschunà in donn considerabel (al. 2 frasa 1). Mo personas che han il dretg d'exercitar la chatscha ed organs da surveglianza dastgan vegnir incumbensads da realisar questas mesiras (art. 12 al. 2 frasa 2 LChP). En il rom da la legislaziun actuala n'è in concept dal «tir de défense» – sco ch'el vegn pratitgà en Frantscha – consequentamain betg adattabel per la Svizra, perquai ch'igl è fixà cleramain, tgi ch'è autorisà da realisar las mesiras. Ina intervenziun per midar la legislaziun numnada sin plaun

federal avess pia la finamira da puspè vulair reveder la revisiun da la Lescha federala da chatscha, ch'è pir gist vegnida deliberada dal Parlament federal en la sessiun da december, ma che n'ha anc betg vigur legala. Quai n'ha actualmain betg grondas schanzas da vegnir acceptà.

Tar il punct 2: Er sco project da pilot correspondent na po il concept dal «tir de défense», che vegn pretendì en l'incumbensa qua avant maun, betg vegnir persequità vinavant. Projects da pilot ston numadamain vegnir realisads en il rom da la legislaziun vertenta, e las basas giuridicas per in tal project da pilot mancan. Ils departaments specifics cumpetents dal chantun han proponì il matg 2022 mesiras da pilot en il sector dal management dal luf a l'Uffizi federal d'ambient (UFAM). Ina mesira prevesa da scolar e d'autorisar tschertas personas dal personal d'alp e da las autoritads communalas per far accziuns da spaventar betg letalas cun meds adattads (petardas, patronas da detunaziun u chaussas sumegliantas). Per realisar la mesira «Incaricar il personal d'alp per accziuns betg letalas da spaventar il luf» ston vegnir resguardadas las disposiziuns dal dretg d'armas. L'Uffizi da chatscha e pestga (UCP) vegn ad elavurar ina glista respectiva da las mesiras concretas da spaventar. Suentar vegn il UFAM a discutir questa glista cun l'Uffizi federal da polizia fedpol. La Regenza ha l'intenziun da persequitar vinavant questa via ch'ella ha gia prendì cun il project dal management dal luf. Sco ulteriur pass prevesa la Regenza da preschentar a la Conferenza da las regenzas dals chantuns alpins (CRCA) la mesira «Incaricar il personal d'alp per accziuns betg letalas da spaventar il luf», ch'è vegnida examinada dal UFAM.

Sa basond sin questas explicaziuns propona la Regenza al Cussegl grond da midar questa incumbensa sco suonda:

Il project da pilot ch'ils departaments cumpetents DIEM e DES han inoltrà il matg 2022 al UFAM per ina mesira dal management dal luf, tenor la quala il personal d'alp tschernì duai dastgar vegnir scolà ed autorisà da far accziuns da spaventar betg letalas cun meds adattads (petardas, patronas da detunaziun u chaussas sumegliantas), sto vegnir persequità vinavant ed en cas d'ina realisaziun vegnir coordinà sur la CRCA cun ils ulteriurs chantuns da muntogna.



En num da la Regenza

Il president:

Marcus Caduff

Il chancelier:

Daniel Spadin

